

**Vischnaunca da Mustér**

# **Regulativ per il persunal communal**

**CUNTEGN**

CAMP D'APPLICAZIUN .....	ART. 1
DRETG SUBSIDIAR .....	ART. 2
RELAZIUN DA SURVETSCH.....	ART. 3
CUMPETENZAS .....	ART. 4
SALARISAZIUN E CLASSIFICAZIUN .....	ART. 5
CLASSAS E CATEGORIAS DA PAGAS .....	ART. 6
RENCONUSCHIENTSCHA PER PRESTAZIUNS EXTRAORDINARIAS .....	ART. 7
SURURAS.....	ART. 8
OBLIGAZIUN DA DOMICIL .....	ART. 9
VESTGADIRA DA SURVETSCH E DA PROTECZIUN.....	ART. 10
INDEMNISAZIUN DALLAS SPESAS .....	ART. 11
CAMP D'APPLICAZIUN ED INDEMNISAZIUN DALLA LAVUR.....	ART. 12
ULTERIURAS CUMPETENZAS .....	ART. 13
CONTESTABLADAD DA DECISIUNS DA DRETG DIL PERSONAL .....	ART. 14
ACTIVITADS ACCESSORIAS ED UFFECIS PUBLICS.....	ART. 15
OBLIGAZIUN ALLA DISCREZIUN.....	ART. 16
REGLAMENTAZIUNS DIVERGENTAS DIL DRETG CANTUNAL.....	ART. 17
VIGUR.....	ART. 18

## **Art. 1 Camp d'applicaziun**

Quei regulativ regla igl engaschament, las obligaziuns ed ils dretgs dils collaboraturs dalla vischnaunca da Mustér.

## **Art. 2 Dretg subsidiar**

Nua che prescripziuns specialas stipuleschan buc expressivamein enzatgei auter, vala la legislaziun da personal dil cantun Grischun e las prescripziuns dall'ordinaziun davart la salarisaziun dils scolasts. Per singulas categorias da collaboraturs resta la legislaziun cantunala e federala resalvada.

## **Art. 3 Relaziun da survetsch**

<sup>1</sup>La relaziun da lavur vegn francada cun in contract tenor il dretg public.

<sup>2</sup>El contract da lavur eis ei en cass motivai pusseivel da stipular reglamentaziuns che svarieschan da quest regulativ.

## **Art. 4 Cumpetenzas**

<sup>1</sup>Tut ils collaboraturs permanents vegnan engaschai dalla suprastonza communal, il personal d'instrucziun ed il meinascola dil cussegl da scola.

<sup>2</sup>Emprendists e substituts vegnan engaschai dalla direcziun communal tenor las disposiziuns legalas valeivlas. L'indemnisaziun vegn fixada individualmein en in contract.

## **Art. 5 Salarisaziun e classificaziun**

<sup>1</sup>La suprastonza communal classifiescha las plazzas en las classas da funcziun tenor in plan da classificaziun. Quei plan sebase sin la scala da pagas dil cantun Grischun. Per ils scolasts vala l'ordinaziun davart la salarisaziun dallas persunas d'instrucziun dil cantun Grischun.

<sup>2</sup>Tier la fixaziun dalla paga sebase la suprastonza communal sin la scala da pagas dil cantun Grischun. Enteifer las classas da paga sa la suprastonza communal applicar il sistem cantunal ni il sistem da scalems.

<sup>3</sup>Sin fundament dil giudicament dils collaboraturs sa la suprastonza communal conceder ina midada dalla classa resp. dil scalem da paga.

## **Art. 6 Classas e categorias da pagas**

<sup>1</sup>Sche la situaziun economica ni las finanzas communalas pretendan, sa la suprastonza communal ordinar per tuts collaboraturs ina bloccada digl alzament dallas pagas.

<sup>2</sup>Malgrad ina bloccada generala digl alzament dallas pagas sa la suprastonza communal en cass specials tuttina conceder in augment dalla classa resp. dil scalem da paga.

**Art. 7 Renconuschientscha per prestaziuns extraordinarias**

La suprastonza communal sa conceder per prestaziuns extraordinarias e sin fundament d'in giudicament personal ina renconuschientscha. La cumponenta da prestaziun munta maximalmein 5 % dalla paga da basa corrispundenta dil collaboratur.

**Art. 8 Sururas**

<sup>1</sup>Sco sururas valan per regla mo uras da lavur che vegnan ordinadas dallas autoritads superiuras ordeifer il temps da menaschi regular ni duront ils dis libers. Sururas ein da principi da cumpensar. In'indemnisaziun finanziaria dallas sururas ei pusseivla mo en cass excepziunals.

<sup>2</sup>Per collaboraturs da cader vegnan las sururas buca indemnisadas. La suprastonza communal sa en cass excepziunals conceder ina renconuschientscha conform ad art. 7.

**Art. 9 Obligaziun da domicil**

Ei vegn giavischau ch'il personal communal prenda domicil en vischnaunca.

**Art. 10 Vestgadira da survetsch e da protecziun**

La suprastonza communal regla il dretg dils collaboraturs per vestgadira da survetsch e protecziun.

**Art. 11 Indemnisaziun dallas spensas**

<sup>1</sup>L'indemnisaziun dallas spensas (inclusiv viadis) sedrezza tenor la reglamentaziun cantunala.

<sup>2</sup>La suprastonza communal regla l'indemnisaziun per il diever da vehichels duront la lavur.

**Art. 12 Camp d'applicaziun ed indemnisaziun dalla lavur**

Il camp d'applicaziun e l'indemnisaziun da personal accessori regla la suprastonza communal.

**Art. 13 Ulteriuras cumpetenzas**

Aschinavon che quest regulativ fixescha nuot auter, ei la suprastonza communal l'istanza che decida definitivamein davart damondas da dretg dil personal.

**Art. 14 Contestabladad da decisiuns da dretg dil personal**

Decisiuns da dretg dil personal vegnan decididas dalla suprastonza communal en davosa istanza, exceptiu il cass ch'igl ei previu da recuorer alla Dertgira administrativa dil cantun Grischun.

## Art. 15 Activitads accessorias ed uffecis publics

<sup>1</sup>Activitads accessorias astgan buca impedir d'ademplier las obligaziuns prescrettas el contract da lavur.

<sup>2</sup>L'execuziun d'ina activitad accessoria d'interess public sco era occupaziuns accessorias pagadas, per las qualas ei vegn impundiu ordeifer la lavur mintg'jamna dapli che quater uras, drovan l'autorisaziun dalla suprastonza communal, resp. dil cussegl da scola.

<sup>3</sup>Sch'ina activitad accessoria coincide cul temps da lavur, eis ei da cumpensar quei temps ni da reducir il pensum da lavur.

<sup>4</sup>Uffecis publics ni mandats da tuttas sorts che savessen collidar cun ils interess dalla vischnaunca ni restrenscher la prestaziun da lavur, drovan il consentiment dalla suprastonza communal, resp. pil personal d'instrucziun e pil meinascola dil cussegl da scola. La damonda corrispundenta ei da far avon che surprender talas funcziuns.

## Art. 16 Obligaziun alla discreziun

<sup>1</sup>Tuts collaboraturs ein obligai a discreziun pertuccont ils fatgs confidai ni surdai ad els en lur uffeci ni survetsch e ch'ei per motivs ufficials ni privats superiors buca destinai per tiarzas personas. La discreziun vala era suenter che la relaziun da lavur ei dissolvida.

<sup>2</sup>Tuts documents surdai ad in collaboratur duront sia activitad per la vischnaunca ni elaborai dad el duront quei temps s'audan alla vischnaunca e restan suenter la fin dalla relaziun da lavur en possess da quella.

## Art. 17 Reglamentaziuns divergentas dil dretg cantunal

Las suandontas prescripziuns dalla lescha da personal (LP) e l'ordinaziun da personal dil cantun Grischun (OP) valan buca per la vischnaunca:

- Art. 31 LP           Fond d'assistenza per il personal
- Art. 39 LP           Prevenziun professiunala
- Art. 53               Domicil, habitaziun da survetsch
- Art. 61 + 62 LP     Cumissiun dil personal: Incumbensas, cumposiziun ed elecziun
- Art. 63 - 68 LP     Cumpetenzas, protecziun giuridica e procedura
- Art. 69 + 70 LP     Camp d'applicaziun/Indemnisaziun da lavur
- Art. 24 OP           Fond d'assistenza per il personal
- Art. 42 OP           Premias, prestaziuns d'assicuranza ed inhabilitad da luvrar
- Art. 44 OP           Cassa da pensiun: Repartiziun dallas contribuziuns
- Art. 44a OP          Extensiun dil plan da prevenziun
- Art. 44b OP          Capital en cass da mort
- Art. 45 OP           Indemnisaziun da partenza

## Art. 18 Vigur

Quest regulativ entra en vigur igl'emprems da schaner 2022 e remplazza il regulativ da salarisaziun dalla vischnaunca da Mustér dils 22 da zercladur 2021, revedius ils 24 da mars 2017.

Approbau dil cussegl da vischnaunca ils 29 d'october 2021.

Il president communal:  
*René Epp*

Il canzlist communal:  
*Andri Hendry*

**Plan da plazzas dalla vischnaunca**

**Total procent da plazzas:                   max.   4'000%**

Administraziun:                               max.   500%

Infrastructura e baghegiar:               max.   380%

Menaschi tecnic:                           max.   1'120%

Formaziun:                                   max.   2'000%

*Il plan da plazzas munta ina part integrala dil preventiv annual.*